


Thaydwan 15



Dinhmung Akhat

Jisu zei khaengloumei rui aniu ta thuaklou e

Jisu zei
khaeng-
loumei
rui aniu ta
thuaklou e

Baibal Pary

Jisu zei khaengloumei rui aniu ta thuaklou e, twmei dinhmei pary sinsw o

Gaychamv Parybuk Charuk. Kasap 22-34. *Jisu rui Thuaklou e.*

Gaychamv Parybuk Charuk tuang kasap 22-34 tei kamaengc lyanna mi pary tei alauc nunc khou paclou o.

Mi pary lam khou alauc nunc khou lat thanv o. Alauc akhat rui dawna nchumh mak e thei, gay e tiki ai thanvmei thu mi khang ramh e twna katilou o. Alauc akhat rui daw nchumh e thei, nchumh the! Daw chuy the! twna katilou o. Gaanv khat rui daw nchumhlou mak saanv thanv dat dat o.

Nang thanv nuhmei latthanv nunc mi khou hei nai e.

Jisu kazei rui khaengna theicloumei lam asaekc tabui tabui tei cho?

Aniu rui simei taancloomei guay khang.

Aniu tuang dandi phungclou khang.

Zinghmei ti thui ganh khang.

Aniw ta tingsaeng zaeng khang gulou khang.

Kamei aniu ta nzianpui zaeng rui.

Akumhna Jisu theiclou bo?

Jisu ta theihchouc khou thaengc luai e.




Jisu ta mbeihloumei tarou tabui sw tina karaeng bam to?

Jisu ringc dat tina!

Jisu rui kaziap nunc ta tabui taanh khang sa bo?


Kabamv kathuic khou tatna meic guayna khou gaychamv dinc o! Jisu nang ta nzian e. Nang ta tingsaeng zaeng khang gulou khang Jisu theiclouna ringc dat the.

Thaydwan 15



Action Lu

Jisu zei khaengloumei rui aniu ta thuaklou e, twmei dinhmei action lu sinswo



Jisu ramzian akhou luangc lyam bam e. Jisu ramzian akhou luangc lyam bam e.
Jisu ramzian akhou luangc lyam bam e. halleluiah!

Jisu zei rui ata gulou the. Jisu zei rui ata gulou the.
Jisu zei rui ata gulou the. halleluiah!

Jisu ramzian akhou luangc lyam bam e. Jisu ramzian akhou luangc lyam bam e.
Jisu ramzian akhou luangc lyam bam e. halleluiah!

(Suan katumc khit khit na suan luanc kathumh o).



Object Lesson

Jisu zei khaengloumei rui aniu ta thuaklou e, twmei dinhmei object lesson sinswo

Ruayduih louc minc chuymei akhat sin o. Kahuap tanhmei ruaiduic tei alauc nunc ta ti kahi o.

Reymei maansei nei tei tabui taanc maanv kan cho twmei thow salou nuh bo?

Alauc nunc daw pw khou, nchumhmei latdau tei permanent marker rui ruayduih khou tei hylou o. Ruayduih tei how tanac tiaph tiap khang nchumhmei latdau guay ruayduih khou tei hy binlou geic o.

Latdau nunc: Reymei maansei nei tei Damhpouc Ravguangc lat piu mak e.
Reymei maansei nei tei simei bumaengc lat piu the. Reymei maansei nei tei Damhpouc Ravguangc rui taanh riu twmei taanc the.

Jisu zei
khaeng-
loumei
rui aniu ta
thuaklou e

Thaydwan 15

Jisu zei
khaeng-
loumei
rui aniu ta
thuaklou e

Dincloumei: Mi ruayduih hei aniu Damhpouc Ravguangc ta thay makmei douc tuang lunghthw kumh tuang e. Aniu Damhpouc Ravguangc ta thay makmei douc, aniu lunghthw hei mi tanhmei ruayduih huap kumhmei tuang e. Aniu Damhpouc Ravguangc ta thay makmei douc aniu simei bumaengc lat piu e; Damhpouc Ravguangc lat piu mak e. Aniu Damhpouc Ravguangc ta thay makmei douc Damhpouc Ravguangc rui taanc o twmei aniu taanh mak e.

Aniu Damhpouc Ravguangc ta thay makmei douc, Damhpouc Ravguangc aniu ta adih nzian cho khatni aniu ta gulou khang Kamei rui tabui taanclou cho twmei aniu thay mak e. Aniu Damhpouc Ravguangc ta thay makmei douc aniu zinghmei khou maan bam khwan e.

Damhpouc Ravguangc rui aniu khang tabui taanclou cho twmei mi ruayduic rui dinclou e. (Mi ruaiduic tei khak pat o.)


Damhpouc Ravguangc rui Jisu paan rui aniu ta Damhpouc Ravguangc khatni meicnunc khou simei lat saloumei, simei lungning ningloumei khatni simei taanv taancloumei kaguayna khou rui gulou e twmei dinclou o. Jisu rui mi kumhmei aniu tuang simei guay hyloumei ruayduih huap khak ganh kumc laa ganclou e.

Aniu ta tingsaeng zaeng khang gulou khang Damhpouc Ravguangc alauc akhat swna guanglou e. Kazanc Jisu kaw e. Meicnunc khou Damhpouc Ravguangc lam dincna, khatni Kamei kaniw ta adih nzian cho khatni kaniw ringc kan tu adih laa nii cho twmei dincna Jisu mbaanv khou lungclou khwan e. Tiki Jisu aniu khang lungcloumei na ramh e, Kamei aniw khang theicloud e. Aniu rui simei lat saloumei khatni taancloumei GUAYNA khang Kamei theicloud e.

Jisu aniu khang theihchouc khou theicloud e, Damhpouc Ravguangc khatni meicnunc khou simei lat saloumei, simei lungning ningloumei khatni simei taanv taancloumei kaguayna tuang dandi phungclou e. Tiki Kamei theic nzut mak e. Zaeng neih thumh khou ringcthau datna ntaw tingkauh khou bam e. Halleluja!

Ntaw thu mi ruaiduic hei akumhna how bo khatni kahi pw khou akumh bo?
Nthan e khatni mbuah e. Mi hei aniu rui kamei thow cho twmei khatni Kamei rui taancloumei, khatni Kazei rui khaengloumei nsa kaipat ta laalouna Jisu khou Iwmlou pw khou aniu lung khou taancloumei e.

Thaydwan 15



Baibal Ningtow Chyam Tuang Talicmei

Jisu zei khaengloumei rui aniu ta thuaklou e, twmei dinhmei Baibal chyam sinsw o

John 3:16 ‘Kalam thu Ravguangc rui mbaanv ta heidikamv nzianpui zaeng rui, kanac mpouh akhat namei ta tiilou the. Thow pw ni kakhou lwmmei guay theic dat makna ringcsuangmei laatow khang e.’

Athei Lat o: Baibal ningtow chyam tei sana action swna dinc o. Kaniw sa thay khatni action sw thay kan e thei nang lev sw nchamc khang alauc nunc ta sa o. Baibal ningtow chyam tei nang kazauh makna kaniw rana sa thay khatni action sw thay mak saanv kaluah dat dat o. Kalam thu Ravguangc rui <action: baanh ngaengv khou pamph khang>, mbaany ta<action: ngguic khang>, heidikamv nzianpui zaeng rui <action: baanh tii pat khang>, kanac mpouh akhat namei ta tiilou the(action: Jisu baanhzung akhat souc ku khang). Thow pw ni kakhou lwmmei guay(action: meic py lev lungthw khou souh khang) theic dat makna (action: mik thw zaw ngguic khang) ringcsuangmei laatow khang e. (action: kati thauna baanh hai kaning khang).

Laalouna Piu Nimei

Jisu zei khaengloumei rui aniu ta thuaklou e, twmei dinhmei laalouna piu nimei sinsw o


Damhpouc Ravguangc rui aniw ta nzianna, aniu rui Damhpouc Ravguangc khatni meicnunc khou lungning rui, lat rui, taanv rui simei taancloomei guay khou rui Jisu paan rui aniu ta gulou e twmei thaymei kiu thu aniw tingsaeng zaeng ringc puni twmei e! Jisu rui aniu ta gulou e twmei kabac thu aniu ta tingsaeng zaeng khang kuaklou the. Aniu ta thuaklou the twmei kabac thu aniu hei Damhpouc Ravguangc mikzaw khou tingsaeng zaeng nthan the twmei tuang e. Jisu rui aniu ta thuaklou e twmei kabac thu aniu hei tingsaeng zaeng Damhpouc Ravguangc nac di the twmei tuang e. Halleluja!

Huayneymei: Damhpouc Ravguangc, Nang ata nzianmei khang thuancku e. Ai rui nang ruc khou khatni meicnunc ruc khou simei lungning ninglou, simei latsa salou, simei taanv taancloou bam khou sini nang ata nzian tanh tan e. Ai rui nang ruc khou khatni meicnunc ruc khou nkhuailoumei tuang simei khou rui ata gulou khang guangmei khang thuancku e.

Damhpouc Ravguangc, Nang lam khou khatni nang rui akhang taancloomei lam khou tingmik tingmik khou thay mbu ku khang nkjav lou o. Ai nang ta lwmna nang khou lwmlou khang nkjav lou o. Nang lam khou khatni nang tuang taanv lam khou ai meicnunc khou dinclou ngam khang nkjav lou o. Jisu zanc khou aniw ney e. Amen.

**Jisu zei
khaeng-
loumei
rui aniu ta
thuaklou e**

Thaydwan 16



Jisu rui ata
tingsaeng
zaeng
khang
gulou the!

Dinhmung Akhat

Jisu rui ata tingsaeng zaeng khang gulou the!

Baibal Pary

Jisu rui ata tingsaeng zaeng khang gulou the, twmei dinhmei pary sinsw o

Gaychamv Parybuk Charuk. Kasap 36-40. *Jisu Ringc e.*

Taanhmei naa: Blackboard khatni chalk, ramh e thei mbut khatni hy nimei tang, ramh e thei chepaek, pensil lev eraser.

Pary tei kamaengc hyna rac o. Kasap akhat pac luaimei sik alauc nunc khou lat thanv o.

1, 2, 3 pary kahouh tho...

Tingkwm mpeyna tat kan khwan the. Nggaanvmei akhat ta ai how ngam e. Kazanh rui John kaw e. John rui hei kumcna sa bammei ai chu ngam e, 'Jisu ta tingpuk khou ai how ngam e. Kamik tei mai kumc e!'


Jisu takuanh mphwanmei khou tuangcna guangmei ta ai how ngam e. Kazanh tei Ravguangc tuang Latkaeng tw e. Jisu tuang thiula khou tei latkaeng nunc hei kumcna ai how ngam e, GUANG GUAY GUANG KHATNIC KAPOUC GUAY KAIPOU!

Maansei zatc kaguayna rui Jisu khang lu suan bammei ta ai how ngam e. Bumaengh guay rui Jisu khang lu suan bammei ta ai how ngam e. Ramh kathuic rui Jisu khang lu suan bammei ta ai how ngam e.

Damhpouc Ravguangc rui hei kumcna sa bammei ai chu ngam e, 'Amei nunc guay ta tingsaeng zaeng khang kanduaklou the. Theihmei maek khe. Mik dui maek khe. Zaengsimei maek khe. Suhmei maek khe. Ramh guay ta ai rui kathanc ti swlou the.'


Jisu rui hei kumcna sa bammei ai chu ngam e, 'Zauc lo, ai guang dat zaic puni. Ai hei tingsaeng zaeng mei e. Ai hei Jisu e. Ai nangniw ta nzian e. Ai rui nangniw ta tingsaeng zaeng khang kanduaklou the.'

Pary tei kamaengc hy khang alauc nunc khou sa o.



Thaydwan 16

Jisu rui ata
tingsaeng
zaeng
khang
gulou the!



Alauc nunc rui pary tei rac datmei: Alauc guayna khang kasing akhat kanei, akhat kanei, pacna tiilou o. Kasing akhatmei alauc akhat lev kasing kaneimei alauc akhat kapam sw nina e. Gaan nei - gaan nei tuang kapang khou tei kasing akhatmei alauc tei rui kapam kasing kaneimei alauc khou tei pary tei raclou nina e. Mi tei luai kan e thei kasing kaneimei alauc tei rui kasing akhatmei alauc khou tei pary tei raclou dat nina e. Mi guay tei luai kan e thei alauc guayna kakang akhat swna guang kaduai dat nina e.

Action Lu

Jisu rui ata tingsaeng zaeng khang gulou the, twmei dinhmei action lu sinsw o Thuanc o Jisu ta, thuanc o. Thuanc o Jisu ta, thuanc o. Thuanc o Jisu ta, thuanc o Ringhpouc rui rih ngam mei khang ta.

Object Lesson

Jisu rui ata tingsaeng zaeng khang gulou the, twmei dinhmei object lesson sinsw o

Kana: Slate khatni chalk haenghmei (haenghmei maek e thei mphwanmei ni nuh e).

Mi slate hei aniu lung khou zinghmei, aniu Ravguangc khou khatni maansei khou simei ninglou kanmei, salou kanmei, khatni taanclou kanmei kumh tuang e twna dinclou o.

Ntaw zauc o. Chalk tei rui slate khou tei hy liamlou o.

Mi hei Jisu zei khaengloumei kumh tuang e. Jisu zei rui simei guay ta gum liamlou e. Jisu rui taanclou kanmei tei meic gaanv khat na rui sini laa ganc dat ngam mak khe. Kamei rui taanclou kan the, nang ta tingsaeng zaeng khang gum liamlou the. Jisu rui aniu ta tingsaeng zaeng khang gulou the kalam thu Jisu thu tingsaeng zaeng ringc bammeipu e.

Thaydwan 16

Baibal Ningtow Chyam Tuang Talicmei

Jisu rui ata tingsaeng zaeng khang gulou the, twmei dinhmei Baibal chyam sinsw o

Ringhpouc twmei hei Damhpouc Ravguangc zanc baihmei akhat e twmei dinclou o.

Ndauhloumei 1: 18 ‘Theic dat makmeipu kiu ai hei e! Ai theicloud kan the, tiki ntaw thu ai tingsaeng ringc bam e. Theihmei khatni taruaihram khamvtaan abaanc khou nai e.’

Memory Competition: Alauc nunc ta karian kathumh ti dinglou o. Karian kathuic khou kahyang ana liangmei rui huna kauh liangmei rui thei liang o.

Reymei rian tuang reymei alauc khou tei, ‘Theic dat makmeipu kiu ai hei e!’ twna suaina salouna, mi tei katangv khou bammei khou tei suaina salou o twna sa o. Mi kumna suaina sa kadai kadaina nkhamh liangmei nganv sa tangc o.

Kaneimei rian tuang reymei alauc khou tei, ‘Ai theicloud kan the, tiki ntaw thu ai tingsaeng ringc bam e’ twna suaina salouna, mi tei katangv khou bammei khou tei suaina salou o twna sa o. Mi kumna suaina sa kadai kadaina nkhamh liangmei nganv sa tangc o.

Kathumhmei mei rian tuang reymei alauc khou tei, ‘Theihmei khatni taruaihram khamvtaan abaanc khou nai e’ twna suaina salouna, mi tei katangv khou bammei khou tei suaina salou o twna sa o. Mi kumna suaina sa kadai kadaina nkhamh liangmei nganv sa tangc o.

Karian akhat tuang nkhamh liangmei alauc ta tei hu khou kaw patna kakhousaloumei lat tei kauc ranvna kauc o twna sa o. Mi tei nchumh dai twna karian reymei alauc nunc khou tei thanv o. Nchumh e twna sa e thei, mi kang khang tei point akhat tii o, mi tei nchamc mak e thei, mi kang khang tei point tii rio. Alauc guayna khou tei nchumhmei lat tei dinclou o.

Karian kanei tuang nkhamh liangmei alauc ta tei hu khou kaw patna kakhousaloumei lat tei kauc ranvna kauc o twna sa o. Mi tei nchumh dai twna karian kaneimei alauc nunc khou tei thanv o. Nchumh e twna sa e thei, mi kang khang tei point akhat tii o, mi tei nchamc mak e thei, mi kang khang tei point tii rio. Alauc guayna khou tei nchumhmei lat tei dinclou o.

Jisu rui ata
tingsaeng
zaeng
khang
gulou the!

Thaydwan 16

Karian kathumh tuang nkhamh liangmei alauc ta tei hu khou kaw patna kakhou saloumei lat tei kauc ranvna kauc o twna sa o. Mi tei nchumh dai twna karian kathumhmei alauc nunc khou tei thanv o. Nchumh e twna sa e thei, mi kang khang tei point akhat tii o, mi tei nchamc mak e thei, mi kang khang tei point tii rio. Alauc guayna khou tei nchumhmei lat tei dinclou o.

Reymei kang tuang alauc guayna, ‘Theic dat makmeipu kiu ai hei e!’ twna sa nchamc khang sa o.

Kaneimei kang tuang alauc guayna, ‘Ai theicloud kan the, tiki ntaw thu ai tingsaeng ringc bam e’ twna sa nchamc khang sa o.

Kathumhmei kang tuang alauc guayna, ‘Theihmei khatni taruaihram khamvtaan abaanc khou nai e’ twna sa nchamc khang sa o.

Jisu rui ata
tingsaeng
zaeng
khang
gulou the!

Laalouna Piu Nimei


Jisu rui ata tingsaeng zaeng khang gulou the, twmei dinhmei laalouna piu nimei sinswo

Jisu hei tingsaeng zaeng ringc bam e twmei kabac thu aniu ta tingsaeng zaeng khang gulou e twmei tuang e. Jisu guang dat puni kumna aniu Kamei lev tingsaeng zaeng lungc bam puni twmei thayna aniw lungc bam khang e. Jisu rui ramh guayna damc kathanclo the. Theic dat mak khe. Mikdui key dat mak khe. Zinghmei nai dat mak khe. Hallelujah!

Huayneymei: Alauc gaanv khat ta huayneymei khang sa o.

Swan: Alauc guayna khang kaniw tuang Gaychamv Parybuk Charuk tei tii o. Alauc guayna kaniw tuang Gaychamv Parybuk Charuk tei pac thay khang nchamlou o.

Thaydwan Kasiamhmei



Baibal tuang Pary nunc khou rui nang rana tuang thaydwan kasiamh o.

Thaydwan akhat khou azuh lou ni cho twmei hei nang alauc nunc le kaganv azuh piu ni cho twmei khou nai e. Thaydwan akhat khou rau nganv pary akhat, action lu akhat khatni nang tuang dinhmung tuang laalouna piu nimei tuang akhat nai nina e.

Step 1: Nang taanv sw nimei alauc nunc khang huayne o. Kaniw lung ni nang lung ni Ravguangc rui chamdaanvlouna Ravguangc khou rui laatow khang huayne o. Thaydwan kathuic khou tabui Baibal bamv tei piu nina cho twmei zaylou khang huayne o.

Step 2: Baibal pary tei ningtow khang pac dat pac datna pac o.

Step 3: Alauc nunc kahaw nuhmei, talicna thay nuhmei, chiwmei thak khou pary rac chada o.

Step 4: Nang rui kapahloumei Baibal pary khou tei rui tabui rui dinhmung sw nina cho twmei dinglou o.

Step 5: Nang akumhna pary rac nina cho khatni alauc nunc ta pary khou tei ti kazauh nina cho twmei kakhanhlou rey o. Latkhang: Drama swna pary rac o, ramh e thei kamaengc hyna pary rac o, ramh e thei alauc nunc mi pary tei drama sw o, ramh e thei alauc nunc ta kakhwan khang piu o, ramh e thei pary tuang lat nunc tei sa kaluah luah o.


Step 6: Pary tuang dinhmung tuang action lu kazauh o. Nang tuang dinhmung tuang action lu thay mak e thei, nang rana lat tei chiwmei action lat khou hy pat o, thaymei lu akhat gwan khou duanclo o.

Step 7: Mi tuang dinhmung tei thaymei rui ntaw aniu panty khou tabui gaeng nuh cho twmei swlou o.

Step 8: Nang khang kaganv nai e thei, object lesson ramh e thei Baibal ningtow chyam tuang game akhat ni kazauhlou o, mi manual khou dincloumei thak kumcna ramh e thei baihmei nang thaymei thiak akhat kazauh o.

Step 9: Nang dinc nimei thaydwan tei nang rui kasiamh o kumna Ravguangc rui alauc nunc khatni nang lung khou taanv swlou pw diu. Nthukmei akhat rui nang alauc ta kahawmei khatni alauc nunc rui nang ta kahawmei hei e.

Huayney o



Ephesia 3:16-19 'Gaat tuang nai dat makmei katuang hymdaihmei khou rui, kabumaengc paan rui, nangniw khou pumtan tilouna, nangniw tuang kalungcmei mei ta tei titanc thau khang ai Ravguangc khou ney e. Lwmmei paan rui nangniw lungc khou Khrista lungclou bam khang ai huayney e. Nangniw nzianmei khou kamaan zangc ntip keyna ding ntipna,

Khrista ramzian kasaanv, kadiat, kathukh, kakaw Ravguangc meic baihmei guay lev nangniw ni thay ngam khang ai huayney e. Ngguay, kasyng thay tangc ngam makmei Khrista ramzian hei thay khang, kumna Ravguangc lwnlung nangniw khou padik sikh sik bam khang e.'

